

खबरां

1. नेपाल च राष्ट्री स्वतंत्र पार्टी आर.एस.पी नै शानदार जित्त दज्ज कराई ऐ। उन्नै 165 सीटें चा 60 पर जित्त हासल करी लैती दी ऐ ते 58एं पर अगगे चलै करदी ऐ, वोटें दी गिनतरी दा कम्म जारी।
2. पच्छिम एशिया च सैन्य संघर्ष अज्ज 8में रोज बी जारी, अमरीका नै इजराएल गी 15 करोड़ डालर कोला मते दे थेहार बेचने दी मंजूरी दिती।
3. केंद्री गृह ते सहकारिता मंत्री अमित शाह होरें उत्तराखंड च 1 ज्हार 100 करोड़ रपे दिएं विकास परियोजनाएं दा उद्घाटन ते नीह पत्थर रक्खेआ।
4. मुल्लै च विजन सब्सिडी आहला घेलू रसोई गैस सलेंडर 60 रपे मैहंगा होआ, कारोबारी सलेंडर च 114 रपे 50 पैहे दा बाद्दा।
5. भारती ग्रैंड मास्टर डी. गुकेश नै प्राग अंतरराष्ट्री शतरंज टूर्नामेंट च मास्टर्स वर्ग दे खीरी गेड़ च अपनी पैहली जित्त दर्ज कीती।

<><><><><><>

Nepal- Election

नेपाल च राष्ट्री स्वतंत्र पार्टी आर.एस.पी गी शानदार जित्त हासल होई ऐ। वीरवारें 165 सीटें लेई होए दे मतदान च आर.एस.पी नै 60 सीटें पर जित्त हासल करी लैती दी ऐ जिसले जे नेपाली कांग्रेस गी अजें धोड़ी छडिं 10 सीटें पर कामयाबी हासल होई ऐ। ओह्दे बाद सी.पी.एन-यू.एम.एल गी छडियां 3 गै सीटां हासल होइयां ना। 5 मार्च गी होए दे आम चुनावें दे बाद उत्थै वोटें दी गिनतरी अजें बी जारी ऐ। आरएसपी 60 सीटां जित्ती चुकी दी ऐ ते 58 सीटें पर अगगे चलै करदी ऐ। चुनावें नतीजें दा रौं दिक्खियै आरएसपी दे समर्थक जश्न मनाना शुरू करी चुके दे ना।

<><><><><><>

PM-Nepal Congrats

प्रधानमंत्री नरेंद्र मोदी होरें अज्ज नेपाल दे लोकें गी चुनावें दे रमानदार ते कामयाबी कन्नै करोआए जाने पर ममारकबाद दिती ऐ। इक सोशल मीडिया पोस्ट च मोदी होरें नेपालवासिं गी उंदे लोकतांत्रिक अधिकारें दा पूरे उत्साह कन्नै इस्तेमाल करने पर खुशी प्रगट कीती। उंन आखेआ कि एह ऐतिहासिक उपलब्धि नेपाल दे लोकतांत्रिक सफर च इक गौरवपूर्ण घडी ऐ। प्रधानमंत्री होरें आखेआ कि इक मिततर त गोआंडी दे रूपै च भारत नेपाल कन्नै मिलियै रमानदारी, तरक्की ते खुशहाली दियां नमियां उंचाइयां छूने लेई बचनबद्द ऐ।

<><><><><><>

West Asia War

पच्छिम एशिया च जारी सैन्य संघर्ष दे चलदे अज्ज उप्परोतली 8में ध्याडे बी हालात चिंता ते तनोतनी आहले बने दे ना। अमरीका इजराएल ते ईरान नै ब्हाई ते ड्रोन हमले जारी रक्खे दे ना। इस्सै दरान अमरीका दे राष्ट्रपति डॉनल्ड ट्रम्प होरें इजराएल गी 15 करोड़ डालर कोला मती रकम दे थेआर बंचने दी मंजूरी देई दिती ऐ। अज्ज बडुलै मूंह न्हरे ईरान दी राजधानी तेहरान पर परतियै ब्हाई हमले होए ना। सोशल मीडिया पर उपलब्ध इक वीडियो च तेहरान दे मेहराबाद ब्हाई अड्डे पर धमाके दे बाद अगू दे उच्चे-उच्च भांबड दिक्खे गए। तेहरान दे पूर्वी ते पच्छिमी हिस्सें च बी केई धमाके होए न ते धुएं दे गुबार दिक्खे जांरदे ना। इजराएली फौज नै तेहरान पर परतियै हमले दी चेतावनी जारी कीती ऐ। संयुक्त राष्ट्र च ईरान दे राजदूत आमिर सईद इरवानी होरें आखेआ कि अमरीका ते इजराएल दे ब्हाई हमलें च अजें धोड़ी 1 ज्हार 332 लोक मारे गे ना। इस्सै दरान अमरीकी सेंटरल कमान नै इस गल्लै दी तस्दीक कीती ऐ कि पिछले हफ्ते ईरान नै ज्हारां बदे हमले कीते ते एहदे शा बी मती गिनतरी फौजी अभियान चलाए। कमान नै आखेआ ऐ कि अमरीकी बलें आप्रेशन एपिक फ्यूरी कोला पैहले हफ्ते च 3 ज्हार कोला मते ठकानें पर हमले कीते ना। तोआई, अमरीकी राष्ट्रपति डॉनल्ड ट्रम्प होरें आखेआ कि ईरान कन्नै कोई समझौता नेई होग ते ईरान गी विजर शत्रु आत्मसमर्पण करना होग। इक सोशल मीडिया पोस्ट च ट्रम्प होरें आखेआ कि अमरीका ते ओह्दे सहयोगी मुल्ल ईरान गी तबाही कोला बचाने लेई हर मुमकिन कोश्ट करदे रौहडन तां जे ईरान दी अर्थ बवस्था पैहले कोला बेहतर होई सकै। तोआई, लेबनान दी सरकारी समाचार एजेंसी नै खबर दिती ऐ जे अज्ज बडुलै पूर्वी लेबनान च हिज्बुल्ला दे गड

नबीचिट कश मकामी लडाकें दी इजराएली बलें कन्नै झडप्फ होई ऐ। साउदी अरब नै बी आगाह कीता ऐ कि ईरान हालात गी होर मता बगाडने दी कोशश नेई करै।

<><><><><><>

Russia-Iran Talk

ईरान दे राष्ट्रपति मसूद पेजिश्कियन होरें आखेआ ऐ कि विजन शर्त समर्पण दी अमरीका दी मंग ओहदा सुखना गै रौहग कीजे ईरान कुसै बी सूरतै च ओहदे अगगे झुकने आह्ला नेई ऐ। उनें खाडी मुलखें पर ईरान दे हमलें पर दुख प्रगट कीता ते आखेआ जे एह हमले सेना दी अंदरूनी गलतफैहमी दे चलदे होए न ते ईरान हमले रोकी देग। तोआई, रूस दे राष्ट्रपति व्लादिमीर पुतिन होरें बी पेजेशियक हुंदे नै फोन पर गल्लबात कीती ऐ। रूस दे राष्ट्रपति हुंदे दफतरै मुजब पुतिन होरें ईरान दे सभनें शा बड्डे नेता ते सीनियर अफसरें दी मौत पर दुख प्रगट कीता ऐ। उनें इस गतिरोध दा कूटनीतिक हल कड्डने पर जोर दित्ता। ईरान नै रूस दे समर्थन लेई आभार प्रगट कीता।

<><><><><><>

Amit-Shah-Uttarakhand

केंद्री गृह ते सहकारिता मंत्री अमित शाह होरें आखेआ ऐ कि मुलख भरै च घुसपैठ ते नजैज कब्जे खलाफ सखत कारवाई जारी ऐ। उनें एह गल्ल हरिद्वार च उत्तराखंड सरकार दे 4 बरे पूरे होने दे सिलसिले च आयोजित इक कार्यक्रम गी संबोधित करदे होई आक्खी। इस मौके पर शाह होरें राज्य लेई 1 ज्हार 100 करोड़ रपे कोला मती लागत आह्लिएं विकास परियोजनाएं दा नीह पत्थर रक्खेआ ते केइएं दा उद्घाटन बी कीता। उनें आखेआ कि उत्तराखंड हून संघर्ष दे दौर चा निकली चुके दा ऐ ते विकास दी बत्तै पर तेजिया कन्नै अगडे बधै करदा ऐ। नागरिक संशोधन अधिनियम दा जिक्र करदे होई शाह होरें आखेआ कि धार्मिक उत्पीड़न दा सामना करने पर भात आए दे लोकें गी भारती नागरिकता दित्ती जानी लोड्ची। उनें आखेआ कि हरिद्वार च पाकिस्तान ते अफगानिस्तान थमां आए दे कोई 200 लोकें गी नागरिकता दित्ती गेदी ऐ।

<><><><><><>

ECI-Voter List

भारत दे मुख् चुनांस आयुक्त ज्ञानेश कुमार होरें आखेआ ऐ कि सेही मतदाता सूचि गै लोकतंत्र दी बुनियाद ऐ ते मतदाता सूचि दी नमें सिरेआ व्यापक जांच ते नजरसानी आहली एस.आई.आर प्रक्रिया दा मकसद बी इये ऐ जे योग्य मतदाता वोट देने दे अपने अधिकार कोला महरूम नेई रेही जाना। अज्ज कोच्ची च केरल विधानसभा चुनांस दिएं तैयारिएं दी समीक्षा करने दे बाद ज्ञानेश कुमार होरें आखेआ कि केरल नै देश दे केई हिस्सें गी लोकतंत्र दे तौर तरीके सिखाए न। उनें आखेआ कि राज्य भर च कुल 30 ज्हार 470 मतदान केंद्र होडन जिंदे च कोई 5 ज्हार नमें केंद्र शामिल कीते गे न ते पारदर्शिता यकीनी बनाने लेई इनें सभनें केंद्रें पर वेब कास्टिंग दी बवस्था कीती जाह्ग। चुनांस आयुक्त होरें इब्बी आखेआ कि 397 मतदान केंद्रें दा प्रबंधन पूरी चाल्ली महिलां करंगन ते 790 कोला मते मतदान केंद्रें गी आदर्श मतदान केंद्र बनाया जाह्ग।

<><><><><><>

PM-Webinar

प्रधानमंत्री नरेंद्र मोदी होर अतरूं संगारें 9 मार्च गी सबका साथ सबका विकास : शिखा कौशल ते युनिवर्सिटी टाउनशिप विशे पर इक वेबीनार गी संबोधत करडन। सूचना ते प्रसारण मंत्रालय नै दस्सेआ ऐ कि वेबीनार च केंद्री बजट 2026-27 दिएं घोशणाएं पर तफसील चर्चा होग। इस वेबीनार दा मकसद मुलखै च शिक्षा, हुनर, एनिमेशन ते विजुअल इफैक्ट्स, गेमिंग ते कॉमिक्स ते क्रिएटर इकोनामी सरबन्धी चमासम गी मजबूत बनाना ऐ।

<><><><><><>

Jaishankar-Raisena

विदेश मंत्री डॉ. एस जयशंकर होरें आखेआ ऐ कि भारत दी तरक्की ते उत्थान दा आंकलन एहदी अपनी ताकत ते छमता दी विनाह पर कीता जाह्ग नां कि होरनें मुलखें दिएं गलतिएं पर। अज्ज रायसीना डायलाग च हिंद महासागर दा भविष्य। विशे पर बोलदे होई डॉ. जयशंकर होरें आखेआ जे भारत दे तरक्की करने ते उबडा उठने दी दिशा भलेआं साफ ऐ ते इसी रोकेआ नेई जाई सकदा। विदेश मंत्री होरें आखेआ कि भारत दी तरक्की कन्नै हिंद महासागर दे होरनें मुलखें गी बी फैयदा पुज्जग ते जेहडे मुलख भारत कन्नै ते भारत दे पक्खै च होंगन। उनें लाजमी तौरा पर मता फैयदा पुज्जना बी तैह ऐ।

<><><><><><>

Shah Parmar Death

केंद्री गृह मंत्री अमित शाह होरें गुजरात च अमरेठ दे विधायक गोविंद भाई परमार हुंदी मौती पर गैहरा दुख प्रगट कीता ऐ। इक सोशल मीडिया पोस्ट च अमित शाह होरें आखेआ कि गोविंद भाई परमार इक समर्पित नेता हे ते उंदा पूरा होना राज्य लेई इक ऐसा नुकसान ऐ जिसी पुरेआ नेई जाई सकदा। शाह होरें आखेआ कि गोविंद भाई परमार होर इलाके दे विकास ते समाज दे सभनें वर्गे दी भलाई बेहतरि लेई प्रतिबद्ध ऐ।

<><><><><><>

Naidu-Air Bus Centre

शैहरी हवाबाजी मंत्री राम मोहन नायडू होरें आखेआ ऐ कि भारत कुल संसारी सतह पर ब्हाई छमता दा इक प्रमुख केंद्र बनियै उभरेआ ऐ। उनें दस्सेआ जे एरोस्पेस क्षेत्र दी प्रमुख कंपनी एयरबस, यूरोप कोला बाहर अपना दूआ सभनें शा बड्डा डिजिटल केंद्र भारत च स्थापित करै करदी ऐ। बैंगलुरु च एयरबस इंडिया टेकनालजी सेंटर दा अज्ज वर्चुअल ढंगे नै उद्घाटन करदे मौके नायडू होरें आखेआ कि इस इकाई च एयरबस दे कारोबारी ज्हाजे ते हैलीकाप्टरें दी महत्वपूर्ण प्रणालिएं गी डिजाइन ते विकसित कीता जाहगा।

<><><><><><>

Pak. Afghan Refugees

अफगानिस्तान ते पाकिस्तान बश्कार चलै करदे संघर्ष कारण कोई 1 लक्ख 18 ज्हार लोक बेघर होई गेदे ना। इन्दे च अफगानिस्तान दे 1 लक्ख 15 ज्हार ते कोई 3 ज्हार पाकिस्तानी लोक शामिल ना। संयुक्त राष्ट्र अफगानिस्तान सहायता मिशन नै दौनें मुलखें गी आखेआ ऐ जे ओह आपसी खार ते गतिरोध गी तुरत खत्म करन ते अंतरराश्ट्री मनुक्खी अधिकार कनुनें दी पालमा करन।

<><><><><><>

LPG-Rates

अज्ज 7 मार्च थमां मुलखे च विजन सब्सिडी आह्ला घरेलू रसोई गैस सलेंडर 60 रपे मैहंगा होई गेआ ऐ। एह्दे कन्नै गै 19 किलोग्राम आहले कारोबारी सलेंडर दी कीमत च 114 रपे 50 पैहले दा बाद्दा कीता गेआ ऐ। दिल्ली च हून 14 इशारिया 2 किलोग्राम आह्ला घरेलू रसोई गैस सलेंडर 853 दे बजाए 713 रपे दा होई गेआ ऐ। इसै चाल्ली मुम्बई च सलेंडर दी कीमत 912 रपे 50 पैहे कोलकाता च 939 रपे ते चेन्नई च 928 रपे 50 पैहे दा थ्होआ'रदा ऐ।

<><><><><><>

Pakistan Petrol

पाकिस्तान च पेट्रोल ते हाई स्पीड डीजल दे भाएं च 55 रपे लीटर दा बाद्दा होई गेआ ऐ ते अज्ज पाकिस्तान च हाई स्पीड डीजल दा मुल्ल 20 प्रतिशत बधियै 355 रपे 86 पैहे लीटर होई गेआ ऐ। इसै चाल्ली पेट्रोल दा भाहू बी 17 प्रतिशत बधियै 321 रपे 17 पैहे लीटर तगर पुज्जी गेआ ऐ। पाकिस्तान गी साउदी अरब ते संयुक्त अरब अमीरात थमां तेल थ्होंदा ऐ जेडा आमतौरा पर होर्मज जलडमरू मध्य आहले रस्तेआ पाकिस्तान च पुज्जदा ऐ।

<><><><><><>

MEA-Fact Check

विदेश मंत्रालय नै सोशल मीडिया पर आवा'रदिएं इनें खबरें दा खंडन कीता ऐ कि साउदी अरब नै इक भारती सने इजराएल दे दो मोसाद एजेंटें गी गिरफ्तार करी लैता ऐ। मंत्रालय दी तत्थ्यें दी जांच करने आहली इकाई नै इस दावे गी फर्जी दस्सेआ ऐ। मंत्रालय नै लोकें अग्गे अपील कीती ऐ जे ओह बेबुनियाद ते झूठे दावें पर यकीन नेई करन ते एसिएं खबरें कोला सौहगे सतर्क रौहन।

<><><><><><>

Chess

भारती ग्रैंड मास्टर डी. गुकेश नै प्राग अंतरराश्ट्री शतरंज टूर्नामेंट दे मास्टर्स वर्ग दे खीरी दौर च स्पेन दे डेविड एंटोन गुजजारो गी हराइयै अपनी पैहली जित्त दर्ज कराई ऐ। उनें काले मोहरें कन्नै खेडदे होई शानदार प्रदर्शन कीता ते इस जित्त दे कन्नै टूर्नामेंट दे 9में ते खीरी गेड च सकारात्मक प्रदर्शन कीता। शुरूआती हार ते ड्रॉ दे बाद गुकेश दी एहू पैहली ते महत्वपूर्ण जित्त ही जेह्दे बाद ओह साड्डे त्रै अंके कन्नै संयुक्त रूप च 9मीं थाहें पर रेह।

<><><><><><>